

## **Стихиры Крестовоздвижения на хвалитех, глас 8:**

**Хвалите Его во гласе трубнем, // хвалите Его во псалтири и гуслех.**

О, преславнаго чудесе, / яко грозд исполнен живота, / понес<sup>ы</sup>й Вышняго, / от земли воздвизаемь Крест видится днесь, / имже вси к Богу привлекохомся, / и пожерта бысть до конца смерть. / О, Древо пречестное, / имже восприяхом во Едеме бессмертную пищу, // Христа славяще!

**Хвалите Его в тимпане и лице, // хвалите Его во струнах и органе.**

**Хвалите Его в кимвалех доброголасных, хвалите Его в кимвалех восклицания. // Всякое дыхание да хвалит Господа.**

О, преславнаго чудесе, / широта Крест<sup>а</sup> и долгота / Небес<sup>и</sup> равна есть, / яко Божественною благодатию / освящает всяческая. / О сем языцы варварстии побеждаются, / о сем скиптры царей утверждаются. / О, божественныя лествицы, / еюже восх<sup>о</sup>дим на Небеса, // возносяще в песнях Христа Господа.

**Слава, и ныне, глас 6:**

Днесь происходит Крест Господень, / и вернии приемлют того желанием, / и берут исцеления / души же и тела и всякия болезни. / Сего целуим радостию и страхом: / страхом, греха ради, яко недостойни суще; / радостию же, спасения ради, / еже подают миру / на том пригвоздивыйся Христос Бог, // имей велию милость.